



LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Äntwert vun der Madamm Ministesch fir Gesondheet a sozial Sécherheet op d'parlamentaresch Fro n° 2900 vum 19. September 2025 vum honorabelen Deputéierten Här Sven Clement.

1. Plangt d'Regierung eng Ännerung bei den aktuelle Dispositiounen iwwer d'Mediatioun?
2. Ass et virgesinn, dass an Zukunft all Partie, déi um Sozialdialog deelhält, eng Mediatioun kann ufroen an net nëmmen d'CNS?
3. Wann eng solch Ännerung virgesinn ass, huet d'Ministesch schonn eng Virstellung fir wéini d'Ëmsetzung vun dëser Reform kéint envisagéiert ginn?
4. Wéi eng Mesurë géif d'Regierung huelen, fir ze garantéieren, dass all Acteur am Sozialdialog déi gläich Rechter huet, wat d'Mediatioun ugeet?

D'Relatiounen tëscht der Gesondheetskeess (CNS) an de Gesondheetsdénsgschtleeschter, déi baussent dem Spidol schaffen, ginn duerch Konventiounen gereegelt. Fir all Kategorie vu Prestataire gëtt eng eege Konventioun ofgeschloss, dorënner fir Dokter, Zännokter, Apdikten, Kinésitherapeuten, Laboratoiren, Transportdénsgschter, Palliativfleeg an aner Gesondheetsberuffer.

D'Konventiounen ginn tëscht der CNS an de beruffleche representative Gruppementen ofgeschloss. D'Konventioun definéiert verbindlech Reegelen zu Echangingen, Tariffer, Bezuelung, Qualitéit, Dokumentatioun, an de Rechter a Flichte vun de Parteien. D'Konventiounen tëscht der CNS an de Gesondheetsdénsgschtleeschter mussen vum Minister deen d'Sozialversécherung a seng Kompetenzen huet geneemegt ginn, op Avis vun der Inspection générale de la sécurité sociale, ier se dann am Journal officiel publizéiert ginn.

D'Konventiounen si vun onbegrenzter Dauer a gëllen fir d'Zukunft, ausser bei Tarif-Adaptatiounen, déi retroaktiv kënnen gëllen. D'Konventiounen kënnen zu all Moment duerch gemeinsamen Accord vun de Parteien geännert ginn. Si kënnen ganz oder deelweis gekënnegt gi vun all Partei, mat engem Préavis vun 12 Méint. D'Verhandlungen fir eng ganz oder deelweis Erneuerung vun de Konventiounen mussen spëtstens zwee Méint no der Kënnegung ufänken.

Wann eng Konventioun net fristgerecht ausgeschafft oder adaptéiert gëtt bannent 6 Méint, gëtt eng Mediatioun ageleet. An deem Fall muss laut dem Gesetz d'Inspection générale de la sécurité sociale d'Parteien zesummeruffe fir e Mediateur ze bestëmmen. Nodeems d'Inspection générale de la sécurité sociale d'Mediatioun initiéiert huet, gëtt sech vun de Parteien op ee Mediateur geeenegt deen da versicht zesumme mat de Parteien eng Léisung ze fanne fir datt si sech eenegen kënnen.

Wann d'Mediatioun am Kader vun neien oder ofgeännerten Konventiounen net bannent dräi Méint no der Ernennung vum Mediateur zu engem Accord kënnt, erstellt de Mediateur e Protokoll vun der Net-Eeenegung an den Dossier geet weider un de Minister deen d'Sozialversécherung a seng Kompetenzen huet.

Obligatoresch Bestëmmungen vun der Konventioun ginn da per groussherzoglecher Reglementéierung festgeluecht deen dann och fir all Prestataire verbindlech ass. Dës obligatoresch Bestëmmungen betreffen ënner anerem d'Organisatioun vum Iwwermëttelen an dem Austausch vun Donnéeën, d'Verpflichtung fir d'Respektéieren vun der Nomenklatur oder d'Tariffer déi net iwwer ee Schlësselwäert definéiert sinn.



Fir Dokteren a Zännoktere mussen zousätzlech follgend Punkten obligatoresch definéiert ginn: d'Respektéiere vun der Fräiheet fir sech ze installéieren, vum Choix vum Dokter duerch de Patient, vun der Prescriptionsfräiheet, a vum beruffleche Geheimnis, d'Garantie fir eng wirtschaftlech Medikatioun déi effektiv, wëssenschaftlech fundéiert an deontologesch konform soll sinn, d'Modalitéite fir d'Iwwerschreidung vun den Tariffer, d'Verbredung vun de Standarde fir eng gutt medezinesch Praxis, d'Modalitéite fir d'Erstellung vun Aktivitéitsrapporter, d'Beräicher wou eng salairéiert Bezuelung gëllt, an d'Relatiounen mam Referenzdokter.

An der gesetzlecher Reegelung zu Lëtzebuerg ass ee Schlësselwäert (valeur lettre-clé) virgesinn an de Konventiounen fir verschidde Prestatairen, deen di respektiv Tariffer ofdeckt. Dat gëllt ënner anerem fir Dokteren a Zännokteren, mee och fir aner Prestataire, wann hir Leeschtungen esou tariféiert ginn. De Schlësselwäert ass eng Basisberechnungsunitéit, déi benotzt gëtt fir d'Honorairé vun de Prestataire ze berechnen. Dëse gëtt periodesch adaptéiert an ass Géigegstand vu Verhandlungen tëscht der CNS an de jeeweilige beruffleche Gruppementen.

D'Revalorisatioun vum Schlësselwäert gëtt all zwee Joer vun de Parteien vun der Konventioun verhandelt, op Ufro, déi virum 1. September vum representative Grupp muss agereecht ginn. Dem Gesetz no däerf dës Revalorisatioun net méi héich si wéi d'Variatioun vum duerchschnëttleche kotisabelen Akommes vun den aktiv versécherter Persounen tëscht dem véierten an dem zweete Joer, virum Joer an deem deen neie Wäert gëllt. Fir de Schlësselwäert vun de Laboratoire fir medezinesch Analysen a klinesch Biologie däerf d'Revalorisatioun d'Variatioun vum järelechen Duerchschnëtt vum Liewenskäschenindex tëscht dem véierten an dem zweete Joer virum betraffene Joer net iwwerschreiden.

Wann Verhandlungen iwwer een neie Schlësselwäert oder d'Tariffer bis den 31. Dezember vun deem Joer scheitern, gëtt och hei eng Mediation vun der Inspection générale de la sécurité sociale ageleet. Wann och dës Mediation iwwer een neie Schlësselwäert oder d'Tariffer scheitert, gëtt e Protokoll vun Net-Eenegung opgestallt an d'Affaire gëtt un de Conseil supérieur de la sécurité sociale weidergereecht, deen eng endgültig Schiedsentscheidung trëfft déi net ufechtbar ass an dann och publizéiert gëtt. Des Entscheidung gëllt da fir all Prestataire deen dem beruffleche Gruppement ugehéiert.

Et ass aktuell net virgesinn d'Dispositionen iwwer d'Mediation ze änneren.

Lëtzebuerg, den 8. Oktober 2025

D'Ministesch fir Gesondheet
a sozial Sécherheet

(s.) Martine Deprez